

Te ako ngātahi

Aoao faatasi

Ko koe, tō tamaiti, me tō whare akoranga kōhungahunga
O oe, o lau tama, ma lau aoga amata

E muamua lava ona aoao e lau tama mea i le aso na fanau mai ai. E iloa aoao mea i le fale, ma le aiga, i totonu o lou afioaga, ma le aoga amata o loo aoga ai. O loo folasia i le pepa lenei le tele o auala e mafai ona e faataitaia e te iloa ai mea e fiafia i ai lau tama ma lua fiafia faatasi e aoao.

E mafai e lau tama i totonu o le aiga ma le aoga amata, ona aoao agavaa e iloa ai fesootai lelei ma isi, maua ai le fiafia ma ola i se olaga e aogā, e sogasogā, ma faamanuiaina ai i aoaoga, i totonu o aoga amata ma le aoga.

O faiaoga muamua lava a tamaiti o matua. E tele auala e mafai ona e fesoasoani i lau tama ia iloa mea. O se tasi o auala e pito sili ona tāua o lou talanoa i lau tama. E maua ai e le tamaitiiti se amataga pito sili ona lelei mo lona olaga aaoaoina. E aogā tele lou talanoa i lau tama i lau gagana tautala, e faaaogā ai upu e fetau lelei ma oe.

O le isi itu e tāua tele, e iloa ma aoao e fanau laiti mea i taaloga ma meafai i aso taitasi. E te fesoasoani i lau tama ia iloa mea, pe a lua taaalo faatasi ma faifaimea faatasi i au feau masani o le aso.



Auaunaga aoga amata i totonu o Aotearoa Niu Sila

I totonu o auaunaga mo aoga amata i totonu o Aotearoa Niu Sila, e tele avanoa e fiafia i ai ma meafai e fai i aso taitasi e pei o le kukaina o meaai ma le faiga o togalaau.

E fesoasoani le faiaoga i le aoga amata o loo aoga ai lau tama e uunaia e aoao mea pe a tago e fai mea e faaaogā ai vali, clay, playdough, poloka e fau ai mea, vai ma le oneone. O nisi o taimi e uma ifo ua palapalā ai! E fai faatasi taaloga a lau tama ma le faiaoga, e talanoa ma fesoasoani i ai le faiaoga e atiae agavaa ma le tomai fou.

I totonu o le aoga amata o loo aoga ai lau tama, o le a fesoasoani le faiaoga i lau tama ia maua lona fiafia pei ona iai i lona aiga, ma fesootai i le gagana o loo faaaogā i le fale ma lana aganuu. E talia ma le fiafia e faiaoga lau fesoasoani e malamalama ai i faiga nei.

O le a faatino foi e faiaoga se fesootaiga malosi, e galulue faatasi ai ma oe e faamautinoa meafai o loo saunia e le aoga e fetaui ma tulaga ma faamoemoega o loo e manao i ai mo lau tama.

E faavae aoga amata uma i totonu o Aotearoa Niu Sila i le Te Whāriki, o le mataupu aoaoina i totonu o aoga amata. O le Te Whāriki o mataupu aoaoina o loo faavae i aganuu e lua o loo folasia i lalo o le Te Tiriti o Waitangi (the Treaty of Waitangi).

Filifiliina o se aoga amata mo lau tama

I totonu o Aotearoa Niu Sila, e mafai ona e filifili mai le tele o aoga amata eseese. E tatau i auaunaga uma nei ona faataunu tulaga maualuga ua faataatia e le malo. O nisi o taimi e tatau ona e faatali mo se avanoa mo lau tama.

Mo tamaiti mai le tolu tausaga le matua ma luga a'e, e aooga fua mo le umi e oo atu i le 20 itula i le vaiaso i totonu o aoga amata. O nisi o aiga e mafai ona maua le fesoasoani e totogi ai aoga amata mai le Work and Income.

O le a faailoa atu e le aoga amata tulaga ua oo i ai taumafaiga a lau tama i le aoga amata. Mo se faataitaiga, o le a faasoa e le faiaoga valivaliga a lau tama, taaloga, fausaga, ma tala faataitai e faaaogā ai video, ata, ma faamatalaga i ana taumafaiga.

Aoga Faataitai

E agavaa ma ua faamauina lesitala o faiaoga i aoga amata uma. E mafai e tamaiti ua atoa le lua tausaga ma luga atu ona auai, ma e masani ona auai i itula masani o aoga.

Kōhangā reo

E faaaogā e tamaiti ma aiga i totonu o kōhangā reo, te reo Māori (gagana Māori) e aoao ma talanoa ai. E malosi lava le lagolagosua e fai e aiga i le faafoeina o auaunaga nei.

Auaunaga tau aoaoga ma tausiga

Pe a ma le 50% o le aufaigaluega ua aoaoina ma faamauina lesitala. E mafai e tamaiti faatoa fanau mai e oo atu i le matua ua mafai ona auai i aoga ona faaaogā auaunaga nei mo le aso atoa poo nai itula o le aso.



Auaunaga Aoga Amata i totonu o Aotearoa Niu Sila

Aoaoga ma tausiga e faatino i le fale

E mafai ona faatino auaunaga nei i le fale a le tamaiti iitii poo le fale a lē o loo faia se tausiga. E lagolagoina lē o loo faia se tausiga e se tasi o faiaoga aoga amata e agavaa.

Playcentres

O playcentres e aogā mo pepe meamea e oo atu i tamaiti ua mafai ona auai i aoga. E faafoe e matua ma aiga nofoaga nei. E saunia foi e playcentres polokalame mo le tausiga o le fanau ma aoga amata.

Playgroups

O le tele o playgroups o loo pulea ma faatonu e tagata mai lea afioaga, ma e tolu itula le umi e faatino ai. E masani lava ona vaai e matua a latou fanau i nofoaga nei.

Aoao ia malamalama i faalogona

E masani lava ona maua tamaiti i faalogona malosi – e ono maua i le fiafia, popole, ita pe fefe. E fesoasoani le faiaoga a le aoga amata ia iloa e lau tama ona faalogona, talanoa i ai, ma faasino i ai le faiga e mafai ai ona faaali ona faalogona i se auala lelei. O tomai nei e mafai ai ona maua e lau tama le fiafia ma faamanuiaina ai i aso uma o lona olaga.

E mafai foi ona e faia mea nei, i le fale:

- » E mafai ona e fesoasoani i lau tama ia malamalama i mea o loo ia lagonaina i lou fesoasoani atu, ia ona iloa faaleo ona faalogona i lau gagana tautala poo le Gagana Peretania (mo se faataitaiga, “Pei uma lava ua ova tele lou fiafia”).
- » A oso le lē fiafia o lau tama, vaai mea e te iloa e maua ai lona toofilemu. Mo se faataitaiga, e mafai ona ta se pese malie, usu se pese, feula faatasi puta, eli le togalaau, pe faitau faatasi se tala.
- » Fesoasonai i lau tama ia iloa auala e mafai ai ona pulea faalogona e pei o le ita, palaai pe popole (mo se faataitaiga, mānava tele i totonu pe taaaalo faatasi e pei o le osooso pe fetamoeai solo).



Ia iloa fesootai lelei ma isi

Mai lava i le taimi na fanau ai, e moomia e tamaiti uma o loo saogalemu, puipua ma alofagia. E moomia ona iloa e tamaiti o loo malamalama lelei tagata matutua i tulaga o loo feagai ma i latou ma o loo tali atu i mea o loo fiafia i ai, manaoga ma mea o moomia.

I totonu o aoga amata, o le a iloa e lau tama ona ia talitonuina ma tali atu i tagata matutua e alofa ia te ia. Ma o le a iloa foi e lau tama ona fesootai lelei ma isi tamaiti – iloa taaaalo faatasi, faasoa, ma iloa faaalaoalo i faalogona ma manaoga a le isi tagata.

E mafai foi ona e faia mea nei, i le fale:

- » Fesoasoani i lau tama ia iloa tuu le avanoa i le isi, faasoa ma atiae sootaga ma isi tamaiti. Mo se faataitaiga, e mafai ona e faapea atu “A uma loa le lua minute o lau faaluega, e mafai ona faalue Theo?” poo le “Ta tipitipi le apu i fasi apu e ono, ona e tago lea ave fasiapu e tolu ma Hana.”
- » Fesoasoani ia latou iloa aoao auala e iloa ai le mea e fai pe a tupu se faaletonu (mo se faataitaiga, ia ona iloa faalogona o isi ma iloa auala e mafai ai ona ia fesoasoani atu).
- » Faailoa i ai lou mitamita pe a e vaai atu o iloa tuu le avanoa i le isi, faasoa pe iloa le mea e fai e foia ai se feeseesega.

Talanoa, faitau, ma tusitusi – faamalie!

O le gagana o le fatu lea o le olaga aoaoina o lau tama.

I totonu o aoga amata o loo aoga ai lau tama, e fesoasoani meafai e pei o le talanoa, taalo, faalogologo i musika ma valivaliga e atiae ai tomai e moomia mo le aoaoina o le faitautusi ma le tusitusi.

E talanoa ma uunaia e le faiaoga lau tama ia iloa faamatala mea o loo fai.

Latou te faitau tala ma usu fatu solo, fai taaloga e faaaogā ai upu poo taaloga e pei o se solo, ma usu faatasi se pese.

E mafai foi ona e faia mea nei, i le fale:

- » Fetufaaai “talanoaga” ma lau pepe poo lau tamaitiiti. Maitau ana gaioiga, leo, upu, ma mea o loo vaavaai atu i ai, ma tali atu i mea o loo ia faia.
- » O le taimi lava ua mafai ai e lau pepe ona uu i lona lima se mea, ona e tago lea e tuu i ai se tusi e fai i se ie, poo se pepa malo e taalo ai. Aua e te popole pe a tago lau tama e tuu le tusi i lona gutu – e iloa ai foi mea, mai gaioiga faapena. Talanoa i ai e uiga i ata i totonu o tusi – e vave iloa e pepe ata o mea e masani ona ia vaaiia.
- » Talanoa i lau tama e uiga i mea e fafia i ai. O le taimi lava ua amata ai ona iloa faaaogā upu, taumafai e faaaauau pea ona faatalanoa.
- » Talanoa ma usu se pese ma lau tama i le gagana o loo faaaogā i le fale, ma faaaogā upu e fetaui ma ouluu. Talanoa i mea o loo tutupu i aso taitasi, ma uunaia e faamatala atu ia te oe mea o loo tutupu.
- » Matamata faatasi se tusi o loo iai ni ata, ma faitau i lau tama se tala. Faamālie. E masani i fanau laiti ona fafia puupuu i se tusi, ma e leai se afaina o lea tulaga. O uiga na e iloa ai aoao le faaaogāina o se tusi.
- » Usu se pese ma faamatala se tala mai le olaga sa e ola mai ai. E mafai ona e faaaogā pepe meataalo e lē malō e fesoasoani e faamatala ai se tala.
- » Asiasi i le faletusi ma tuu lau tama e filifili tusi o loo manao e ave i le fale. E ave fua i le fale tusi mo tamaiti mai le faletusi. E ono maua i le faletusi o loo lata ane i le nofoaga o loo e aumau ai tala mo tamaiti e faalogologo fua i ai.
- » Faamalosi i lau tama ia iloa tusi se ata ma oosi le peni – mo se faataitaiga, faaaogā ai penitala, penivali, vali poo le penisina. E lē tāua le ese o foliga o lana ata na vali ma foliga o se mea o e iloa.
- » Vaai solo faatasi ma lau tama mataitusi ma upu e maua i totonu o le fale ma fafo atu. Mo se faataitaiga, e mafai ona su'e le mataitusi muamua o le igoa o lau tama.



Matematika, faasaienisi, ma tekonolosi - faamālie!

E iloa e tamaiti mataupu tau matematika, faasaienisi, ma tekonolosi pe a saili i mea o loo siomia ai o ia, talanoa i mea o vaiaia, ma iloa le uiga o mea.

E tele meafai i totonu o aoga amata e fesoasoani i lau tama ia iloa mataupu tau matematika, faasaienisi, ma tekonolosi. O le a iloa auala e iloa atili ai mea o loo siomia ai o ia pe a matamata i laau poo meaola, taalo i mea e pei o le oneone ma le vai, ma mafaufau pe faapefea ona ola se masini.

E iloa foi e tamaiti faavasega mea e faaaogā ai le iloa faamatematika pe a tago e faitau, fua, ma faavasega se mea, faapena foi i valivaliga ma taaloga e gaioi ai le tino. Mo se faataitaiga, e ono talanoa le faiaoga i tamaiti a o faatino taaloga, ma faaaogā upu e pei o le "luga", "lalo", "ui", "tua", poo "luga atu."

E mafai foi ona e faia mea nei, i le fale:

- » Uunaia lau tama ia naunau e fia iloa mea ma fesili i le tele o mea.
- » Fai se taaloga ma lau tama e faitau ai numera. Faitau sitepu pe a lua savali i luga ma lalo. Poo le faitau o numera o ipu'ai i luga o le laulau.
- » Talanoa i lau tama i foliga o mea, leo, ma le manogi o mea pe a lua iai i le fale poo isi nofoaga e te lua tafafao ai.
- » Fau ni mea e faaaogā ai soo se ituaiga foliga ma le tino. Fau se fale logo poo se 'olo e faaaogā ai poloka laau, apa meaai o loo taatia i le umukuka, poo pusa e lē o faaaogāina.
- » Fesoasoani i lau tama ia iloa numera, foliga, lautele, ma le faiga masani o meafai i aso taitasi. Taalo le taaloga "faasino le numera" o loo pipii i pusameli poo taavale pe a lua savalivali solo. Poo le faitau le numera o taavale lanu mumu i le nofoaga o loo paka ai taavale i le supamaketi.
- » Talanoa i lau tama e uiga i mea pe a e fesoasoani i ai i le kukaina o meaai, fufulu ipu, eli le togalaau, fau se 'olo i oneone i le matafaga, pe taaalo i le vai.

Faasino lelei i lau tama le faaaogāina o masini e pei o telefoni, tablets poo komepiuta, ma faatapulaa le umi e faaaogā ai. Mo le manua lelei o aoaoga ma mea o tau atiae - e sili ona lelei pe a foia le faaaogā e tamaiti e i lalo o le lua tausaga le matutua masini ua ta'ua, ma faatapulaa le umi e faaaogā ai mo se itula mo tamaiti ua lua tausaga le matua ma luga atu - e pito sili ona aogā pe a itiiti le taimi e faaaogā ai.





Ata, musika, siva, ma tala faatino – faamālie!

E mafai e tamaiti ona faailoa o latou faalogona ma manatu i ata, musika, siva, ma tala faatino. O musika, siva, tala faatino ma meafai i ata, o ni auala lelei tele e fesoasoani i lau tama ia iloa aoao lana gagana ma lana aganuu.

E tele manatu ma mea o loo faaaogā i totonu o aoga amata e faaosofia ai mafaufauga a lau tama. E ono aofia ai le faataitai o teuga eseese, mea faifaaili, vali, clay, playdough, laau, ma fausia se mea e faaaogā ai ata. O le a fesoasoani faiaoga ia mafai e tamaiti ona faaaogā ma le saogalemu meafaigaluega faigofie, e pei o le seleulu, ili, ma le samala.

E faamalosi ma fai mea faatasi foi le falaoga ma lau tama i ana taaloga e fatu lava e ia.

E mafai foi ona e faia mea nei, i le fale:

- » Taalo, siva, ma fatu ni taaloga ma lau tama. Tuu le avanoa i lau tama na te taitai ai le faiga o se mea.
- » Unaia lau tama e faaaogā ona mafaufauga – mo se faataitaiga, faataitai teuga eseese, faaaogā meafale e fau ai se vaa, vaalele e alu i le vanimonimo, poo se faleoloa, ma faatagā pei o se tagata faifaiva, astronaut poo se faatauoloa. Taalo faatasi i ana taaloga o loo fai, tusa lava pe goto le vaa ma ua ai oe e se kolokokaila!
- » Faamanaia mea e fai e faaaogā ai le tele o mea eseese e tusi ai se ata, e pei o vali, penisina, penivali, clay poo playdough, vavae, ma laufala. Fai faatasi ma lau tama, se pupuvao e faaaogā ai fasilaau, palapala, ma laulaau, poo le tusi o se ata i luga o le oneone i le matafaga.
- » Faaali i lau tama lou fafia tele ma lou mimita i ana ata sa vali, i lou fesili atu i le uiga o mea ma faapipii ana valivaliga i le fale.
- » Faalogologo i musika, pese ma sisiva faatasi.
- » Fau se mea faifaaili, mo se faataitaiga, faatumu se apa poo se fagu uga i oneone poo ni maa. Lulu laia pe a ta le musika ma e pese ma siva atu ai i le musika.